

Mester mehora organisacion y gestion financiero pa yega na un cuenta anual controlabel

**Recientemente miembro-
nan di Parlamento di Aruba
a ricibi un presentacion to-
cante e proceso di ehecucion
di Landspakket ta andando.
Durante e presentacion a
trece dilanti diferente thema
relacion na e ehecucion di
e Landspakket. Un di nan
ta e tema di administracion
financiero y estadistica.**


Sr. Roland Pang a elabora riba e tema 'Bista riba e administracion financiero'. El a splica cu dos aña pasa den parlamento a presenta e road map cu loke mester logra pa por yega na finanzas publico sostenibel riba un termino mas largo, 'theory of change'.

E 'theory of change' aki, el a indica, ta parti den tres columna: e parti robes ta e organisacion y gestion financiero, e parti drechi cu ta e politica financiero y e parti memey ta e presupuesto. Tur tres hunto na dado momento tin un union pa por yega na finanzas publico sostenibel.

Pang a sigui splica cu mirando e palabracion cu tin cu Hulanda cu entrante cuenta anual 2026 Aruba mester tin un cuenta anual controla, e enfoke aworaki ta riba e columna di organisacion y gestion financiero.

El a indica cu tin diferente proyecto andando relaciona cu tema aki, pero e puntonan mas importante pa cuenta anual 2026 ta e cambio di sistema di rapportnan, 3 lines model, gestion di material y maneho di informacion y IT pa e procesonan financiero.

Pang a resalta cu pa yega na un cuenta anual controla na momentonan aki no tin un marco di standard bon pa configura e cuenta anual ni pa controla esaki. Den e cuadro ey Directie



Financiën y CAD, cu apoyo di un deskundige, a señala algun cambio cu ta necesario den e regulacion di cumplimiento y tambe algun base cu ta necesario pa por yega na un marco di standard.

E concepto ey, el a menciona, a ser entrega entre tanto na DWZ y DWZ ta analisando e pa por yega na e producto final. E intencion ta pa comienso di otro año por tin algo asina cla.

Local ta e 3-lines model, Pang a indica cu esaki ta un tecnologia nobo cu ta mas conoci bou di e number 3-lines defense model cu mester reforsa bek den e aparato gubernamental completo.

El a splica cu ta encera reforsa e prome liña cu ta unda e dienden ta pa drecha nan proceso financiero pa asina por tin un base pa informacion cu ta ser usa pa traha e cuenta anual.

El a sigui splica cu e 3-lines model aworaki ta den un proceso di destaho pasobra ta buscando un partido cu por implementele. El a menciona cu aña pasa tabatin un proyecto caminda a usa e 10 procesonan financiero den gobierno y laga

un partido haci un analisis door di dje pa wak con por drech'e. E implementacion aki lo zorg pa e model ey ser introduci na tur e departamentonan cu ta den gobierno.

Pa loke ta e punto di gestion di material, el a resalta cu esaki tambe ta importante pasobra den e cuenta anual tin un pot grandi di balansa cu ta representa e material cu tin den gobierno cu ta activa den balansa, pero no tin conocimiento ainda kico tin ni con tin esaki registra.

E gestion di material ta trece conocemento atrobe di kico tin na gestion material den gobierno completo, locual ta trata edificio, auto, computer, etc. con ta cumprele, con ta deshaci di dje, con ta traspasa, con ta ward'e, etc. Tur esey ta wordo regla den gestion di material.

Por ultimo, den e punto di maneho di informacion y IT, Pang a remarca cu no ta desconoci cu Aruba su capacidad pa genera informacion, en particular informacion financiero, no ta optimal ainda. Pa por yega na un cuenta anual controlabel na 2026, el a indica, mester mehora y reforsa henter e maneho y gestion di

informacion y IT cu tin rond
di tur e procesonan financiero.

Den e cuadro di esaki, el a agrega, tin un proyecto andando, tin dialogo andando cu partidonan cu por yuda den esaki, pero ta un punto cu mester concretisa e aña aki ainda.

Relacion na e tema di informacion, Sr. Desiree Helder a duna un actualisacion tocante e Sistema Estadistico Nacional (NSS). El a indica cu manera a splica un tempo pasa, e sistema aki ta encera un sistema general cu ta encarga cu produci estadisticanan nacional oficial pa pais Aruba.

CBS mes, pero tambe tur otro partido, departamento di gobierno cu ta produci estadística, tambe lo forma parti di e sistema aki.

El a indica cu den e sistema aki ta ricibi data, actualmente ta den proceso pa automatisa esaki lo mas miho posibel, y despues ta sigui pa procesa y coregi data si ta necesario pa e estadisticanan oficial ta bon produci.

El a sigui splica cu despues ta pasa pa e proceso di archiva e data pa analisisnan por ser realisa y keda wordo realisa, pa e por señala tendencianan, entre otro. Den e analisis ta tene cuenta tambe cu e definicionnan internacional y metodologia internacional pa e datanan cu ta ser analisa y estadistica cu ta ser produci ta den liña tambe cu esunnan cu internacionalmente ta ser pidi.

Si acaso no tin definicion internacional, ta usa e definicionnan nacional den palabracion cu otro instancianan cu tin e informacion necesario.

Sra. Helder a indica cu locual ta
pasa e ora ta cu nan ta produci
estadisticanan oficial nacional y

promete ta cuminsa cu un parti chikito y ta keda expande cada biaha cu tin mas informacion. No solamente NSS ta dicidi esey, pero tambe tin un grupo di persona cu ta duna conseho na NSS pa loke ta e estadisticanan cu tin mester na Aruba.

E grupo di persona aki den un comision lo duna conseho pa loke ta data cu mester pa maneho, pero tambe data cu e sector priva mester pa duna nan informacion necesario pa haci nan maneho lo miho posibel.

El a indica cu ora produci e estadisticanan aki ta publica esaki pa conseheronan den gobierno, pa funcionarionan publico, pero tambe sector priva y sector di educacion pa nan por tin acceso na informacion cu nan tin mester pa na por nan haci nan trabou.

Helder a splica cu e procesonan a ser parti den diferente proyecto. E prome cu a cuminsa cune ta e legislacion, cual el a remarca tabata un proceso intensivo y largo door cu na Aruba tin dificultad cu e parti di legislacion. Nan a huur un hurista di legislacion di Hulanda pa yuda traha e legislacion hunto cu DWZ. El a resalta cu e proceso a tuma su tempo pasobra ta importante pa delinea hunto cu partnernan kico precies e legislacion mester bisa y kico mester ankra den ley pa e forma di traha nobo.

E otro parti ta e desaroyo di un plataforma digital na unda e data ta ser warda, analisa y procesa. El a indica cu ta bezig cu e plataforma, den sentido cu ta trahando e software y hardware cu ta involvi den parti aki. Segun el a indica, si tur cos ta bon mita pa fin di november e plataforma lo ta cla. Esaki ta un parti esencial di e proyectonan cu ta andando.

Ta trahando tambe riba e plataforma digital pa publica e estadisticanan cual mester ta accesibel, facil y duidelijk pa cualkier persona. Tin e diseño cla, ta bay presenta esaki pronto pa wak si e ta cumpli cu e deseo di e usarionan.

Por ultimo el a indica nan ta bezig cu training di e personal pasobra ta esencial pa configura e proceduranan, pero ta importante pa train e personal tambe y keda train nan pa nan ta actualisa cu e programanan cu ta traha estadisticanan continuamente.

